

CONSELLERÍA DE TRABALLO

Orde do 30 de decembro de 2008 pola que se establecen as bases reguladoras das axudas destinadas a actividades de fomento da prevención de riscos laborais na Comunidade Autónoma de Galicia no exercicio de 2009.

A Constitución española de 1978 recolle, dentro dos principios rectores da política social e económica, que os poderes públicos velarán pola seguridade e hixiene no traballo.

O Estatuto de autonomía de Galicia, aprobado pola Lei orgánica 1/1981, do 6 de abril, establece no seu artigo 29, epígrafe 1, que lle corresponde á Comunidade Autónoma de Galicia a execución da lexislación básica do Estado en materia laboral.

Mediante o Real decreto 2381/1982, do 24 de xullo, a Comunidade Autónoma de Galicia recibiu o traspaso de funcións e servizos da Administración do Estado en materia de gabinetes técnicos provinciais do Instituto de Seguridade e Hixiene no Traballo.

O Decreto 536/2005, do 6 de outubro, polo que se establece a estrutura orgánica da Consellería de Traballo, modificada polo Decreto 20/2007, do 22 de febreiro, atribúelle a esta, a través da Dirección Xeral de Relacións Laborais, o exercicio das competencias e funcións, entre outras materias, relativas á prevención de riscos laborais.

Na Lei 31/1995, do 8 de novembro, de prevención de riscos laborais, recóllese o mandato de que as administracións públicas competentes promoverán a prevención e o asesoramento, incluídas a asistencia e a cooperación técnica, a información, divulgación, formación e investigación en materia preventiva, coa finalidade de promover melloras nas condicións de traballo dirixidas a elevar o nivel de protección e da seguridade e saúde laboral das traballadoras e dos traballadores.

A Lei 54/2003, do 12 de decembro, que modifica a Lei 31/1995, establece o obxectivo de combater dun xeito activo a sinistralidade laboral así como o de reforzar a necesidade de integrar a prevención de riscos laborais nos sistemas de xestión da empresa. Isto fai preciso instrumentar mecanismos para as empresas galegas que lles faciliten dar cumprimento ao novo marco normativo e á normativa de desenvolvemento existente en materia de prevención de riscos laborais como actividade integrada no conxunto de actuacións e decisións da empresa.

O obxecto desta orde é concretar os principios xerais contidos na Lei 9/2007, do 13 de xuño, de subvencións de Galicia, no relativo ás axudas para fomento da prevención de riscos laborais entre as traballadoras e os traballadores de Galicia mediante actividades de formación (xornadas técnicas, seminarios, cursos de prevención, etc.), así como de pro-

moción, difusión e comunicación sobre a normativa e aspectos máis relevantes da seguridade e saúde laboral entre os distintos sectores afectados, co obxecto de impulsar a presenza de recursos preventivos na empresa e fomentando unha auténtica cultura de prevención de riscos laborais no traballo.

Así, o financiamento das axudas previstas nesta orde de convocatoria farase con cargo aos créditos dos programas 16.04.324B. 444.0 (60.000 €) código de proxecto 2009 01030 e 16.04.324B. 481.1 (2.062.000 €) código de proxecto 2009 01032.

En todo caso, o gasto proxectado tramitarase como expediente anticipado segundo o disposto na orde da Consellería de Economía e Facenda do 11 de febreiro de 1998, modificada polas ordes do 27 de novembro de 2000 e 25 de outubro de 2001.

Consecuentemente con todo o anterior, consultados o Consello Galego de Seguridade e Saúde Laboral e o Consello Galego de Relacións Laborais, en exercicio das facultades que me confire o artigo 34 da Lei 1/1983, do 22 de febreiro, reguladora da Xunta e da súa Presidencia, modificada parcialmente pola Lei 11/1988, do 20 de outubro,

DISPOÑO:

CAPÍTULO I

ÁMBITO E RÉXIME DE AXUDAS

Artigo 1º.-*Obxecto e finalidade.*

1. Esta orde ten por obxecto o establecemento das bases reguladoras e as condicións polas que se rexerá, no ámbito da Comunidade Autónoma de Galicia, tanto a convocatoria pública como a execución das axudas destinadas a actividades de fomento da prevención de riscos laborais en Galicia, correspondentes ao exercicio de 2009, xestionadas pola Consellería de Traballo, a través da Dirección Xeral de Relacións Laborais.

2. A convocatoria das subvencións previstas nesta orde realizarase mediante réxime de concorrencia competitiva.

Artigo 2º.-*Entidades beneficiarias.*

1. As entidades beneficiarias das axudas recollidas nesta orde de convocatoria estarán incluídas en dous programas:

A. Entidades sen ánimo de lucro que teñan a súa sede social na Comunidade Autónoma de Galicia e que polos seus fins teñan vocación de fomento da prevención de riscos laborais entre as empresas e as traballadoras e os traballadores de Galicia.

B. Universidades situadas na Comunidade Autónoma de Galicia.

2. Non poderán ser beneficiarias destas axudas:

a) Aquelas entidades en que concorra algunha das circunstancias a que se refire o artigo 10, puntos 2º e 3º, da Lei 9/2007, do 13 de xuño, de subvencións de Galicia.

b) As administracións públicas, as sociedades públicas, nin as entidades vinculadas ou dependentes de calquera delas.

3. As entidades beneficiarias das subvencións reguladas nesta orde poderán subcontratar, por unha soa vez, a realización das accións financiadas con cargo a esta convocatoria, tendo en conta que a subcontratación non pode supoñer un aumento do custo de execución da acción subvencionada, e que deberá ser realizada consonte o establecido no artigo 27 da Lei 9/2007, do 13 de xuño. Ademais, os/as subcontratistas deberán facilitarlles aos organismos de auditoría e control toda a información necesaria relativa ás accións subcontratadas. Esta subcontratación poderá chegar ata o 100% do importe da acción.

CAPÍTULO II

MODALIDADES DE AXUDA

Artigo 3º.-*Gastos que se subvencionarán.*

1. As actividades de fomento da prevención de riscos laborais recollidas nesta orde serán obxecto de subvención para compensar os custos derivados da súa execución, incluíndo os custos indirectos recollidos no artigo 29.9º da Lei 9/2007, do 13 de xuño, de subvencións de Galicia, de acordo cos criterios que se recollen no artigo 9.3º e sen prexuízo de que a entidade solicitante achegue unha parte do orzamento total da actividade solicitada.

2. Serán subvencionables as seguintes actuacións:

-De formación, destinadas aos traballadores/as galegos/as.

-Estudos e traballos técnicos relacionados coa seguridade e saúde laboral.

-Realización de ferramentas prácticas para implantación de actuacións en seguridade e saúde laboral.

-De investigación e de prospección dirixidas á mellora da prevención de riscos laborais, así como estudos de condicións de traballo en sectores concretos de actividade económica.

-De difusión, sensibilización e intercambio de experiencias (conferencias, xornadas, seminarios e publicacións):

a) De difusión normativa e técnica, en relación coa Lei de prevención de riscos laborais e normativa de desenvolvemento.

b) De sensibilización empresarial para investimento específico en prevención de riscos laborais.

c) De intercambio de experiencias e boas prácticas en seguridade e saúde laboral.

3. O cobramento destas subvencións será incompatible coa percepción de calquera outra axuda pública ou privada da mesma natureza para a mesma actuación.

Artigo 4º.-*Período de imputación de gastos.*

Poderanse financiar con cargo a esta orde de convocatoria os gastos derivados de accións realizadas desde o 1 de xaneiro de 2009 ata que rematen, conforme o sinalado no artigo seguinte.

Artigo 5º.-*Remate e xustificación das accións.*

Todas as accións deberán estar rematadas e xustificadas, como data límite, o 31 de outubro de 2009.

CAPÍTULO III

DA CONVOCATORIA PÚBLICA

Artigo 6º.-*Solicitudes.*

1. As entidades incluídas no artigo 2º que desexen participar nas actuacións que se regulan nesta orde de convocatoria deberán formalizar a correspondente solicitude no modelo normalizado que se publica como anexo I a esta orde e que se subministrará nas delegacións provinciais da consellería, na Dirección Xeral de Relacións Laborais, en calquera das oficinas administrativas de información ao cidadán e na páxina web da Consellería de Traballo, subscrita pola persoa ou representante legal da entidade e deberá ir acompañada da seguinte documentación:

a) Documentación acreditativa da representación legal suficiente para asinar a solicitude.

b) Copia dos estatutos ou escritura pública de constitución da entidade.

c) Copia compulsada do CIF ou NIF da entidade.

d) Unha ficha por cada unha das accións solicitadas no modelo normalizado (anexo II).

e) Declaración de conxunto de todas as solicitudes efectuadas ou concedidas para a mesma acción perante as distintas administracións públicas competentes ou outros entes públicos.

f) Declaración responsable de non estar incurso en supostos de prohibicións para obter a condición de entidade beneficiaria de subvencións (anexo III).

g) Memoria das actividades que se realizarán para as que solicita a subvención, especificando o seu custo e desagregando os ingresos e gastos da acción solicitada. Indicarase, así mesmo, se a entidade colabora no financiamento da acción solicitada e, de ser o caso, a cantidade que achega.

2. As solicitudes presentaranse na Consellería de Traballo ou por calquera das formas previstas no artigo 38.4º da Lei 30/1992, do 26 de novembro, de réxime xurídico das administracións públicas e do procedemento administrativo común.

Artículo 7º.-*Publicidade das axudas.*

1. De acordo co establecido no artigo 14 letra ñ) da Lei 9/2007, as entidades beneficiarias quedan informadas da existencia do Rexistro Público de Subvencións e dos extremos previstos no artigo 5 da Lei orgánica 15/1999, do 13 de decembro, de protección de datos de carácter persoal, autorizando a inclusión destas axudas no dito rexistro e, de ser o caso, no de sancións, creados nos artigos 44 e 45 da Lei 7/2005, do 29 de decembro, de orzamentos xerais da comunidade autónoma para o ano 2006.

2. Así mesmo, e tal como se recolle no artigo 15 da Lei 9/2007, do 13 de xuño, os órganos administrativos concedentes procederán a publicar no *Diario Oficial de Galicia* as subvencións concedidas, indicando a convocatoria, o programa de crédito orzamentario a que se imputan, o beneficiario, a cantidade concedida e a finalidade ou as finalidades da subvención.

Igualmente, publicaranse na páxina web oficial nos termos previstos no artigo 13.4º da Lei 4/2006, do 30 de xuño, de transparencia e boas prácticas na Administración pública galega.

Artigo 8º.-*Prazo.*

1. O prazo para a presentación das solicitudes será dun mes contado desde o día seguinte ao da publicación desta orde.

2. No suposto de que a solicitude non cumpra os requisitos sinalados na convocatoria ou a documentación presentada conteña erros ou sexa insuficiente, requirirase a entidade para que, nun prazo de 10 días, emende a falta ou achegue os documentos preceptivos, con indicación de que, se así non o fixese, se considerará que desistiu da súa solicitude, logo de resolución que así o declare.

Artigo 9º.-*Procedemento.*

1. O órgano instructor do procedemento será o Servizo de Seguridade e Saúde Laboral da Dirección Xeral de Relacións Laborais.

2. O procedemento que se seguirá na tramitación e instrución dos expedientes será o establecido no artigo 21 da Lei 9/2007, do 13 de xuño, coas concrecións que se establecen nos parágrafos seguintes.

3. A comisión de valoración, para avaliar as solicitudes, terá en conta os seguintes criterios:

-Representatividade da entidade solicitante (de 0 a 2 puntos).

-Número de persoas destinatarias a que van dirixidas as accións (de 0 a 3 puntos).

-Dimensión plurisectorial ou galega da acción proposta (de 0 a 2 puntos).

-Transferibilidade da actuación ou ferramentas a outros colectivos, sectores ou territorios (de 0 a 2 puntos).

-Achega de elementos innovadores (de 0 a 1 puntos).

-Maior índice de sinistralidade laboral en Galicia sobre o sector en que se pretende actuar (de 0 a 3 puntos).

-Metodoloxía e recursos empregados para o desenvolvemento dos proxectos (de 0 a 2 puntos).

-Participación da entidade no financiamento da acción (de 0 a 2 puntos).

-Participación no proxecto de organizacións sindicais e empresariais (de 0 a 5 puntos).

-Experiencia da entidade solicitante no desenvolvemento de acción de fomento da prevención de riscos laborais (de 0 a 3 puntos).

-Emprego da lingua galega na realización de actividades ou condutas para as que se solicita a axuda (artigo 20.1º da Lei 9/2007, do 13 de xuño, de subvencións de Galicia) (0 a 3 puntos).

4. Para os efectos do previsto neste artigo, a comisión de valoración estará composta polos seguintes membros: a/o xefa/e de servizo de Seguridade e Saúde Laboral, que a presidirá, e serán vogais a/o xefa/e de sección de Seguridade e Saúde Laboral e dúas persoas compoñentes do funcionariado adscrito á Dirección Xeral de Relacións Laborais; unha delas actuará como secretario ou secretaria.

5. Se, por calquera causa, no momento en que a comisión de valoración teña que examinar as solicitudes algunha das persoas que a compoñen non puidese asistir, será substituída pola persoa que para o efecto designe a directora xeral de Relacións Laborais.

6. A contía máxima que se subvencionará determinarase do seguinte xeito:

-A entidade solicitante da subvención xuntará á súa solicitude unha valoración detallada e razoada do custo previsto da acción solicitada, na cal indicará, así mesmo, a cantidade que achega, de ser o caso, para o seu financiamento.

-A comisión de valoración, unha vez avaliadas as solicitudes presentadas, de acordo cos criterios de valoración establecidos nesta orde, elevaralle informe ao órgano competente para resolver as solicitudes presentadas.

O importe total das axudas percibidas non poderá superar o custo das actividades subvencionadas.

7. O xefe de servizo de Seguridade e Saúde Laboral, tendo en conta o informe da comisión de valoración, elevará proposta de resolución ante o órgano competente para resolver.

Artigo 10º.-*Resolución.*

1. A resolución dos expedientes de axudas, logo do informe da comisión de valoración, do cumprimento do trámite de audiencia cando proceda, e fiscalizada a proposta pola respectiva intervención, corresponderalle á directora xeral de Relacións Laborais, por delegación do conselleiro de Traballo.

As resolucións deberán ser notificadas ás entidades interesadas no prazo de 10 días desde que se diten; estas disporán dun prazo de 10 días para comunicar a aceptación da subvención concedida.

2. A resolución dos expedientes deberá producirse no prazo de tres meses contados desde o día seguinte ao de remate de prazo de presentación de solicitudes. Transcorrido o citado prazo sen que recaese resolución expresa, esta entenderase denegada.

3. As resolucións ditadas poñen fin á vía administrativa, e contra elas poderá interpoñerse, potestativamente, recurso de reposición ante o órgano que ditou o acto, no prazo dun mes desde a súa notificación, de acordo co disposto no artigo 117 da Lei 30/1992, do 26 de novembro, de réxime xurídico das administracións públicas e do procedemento administrativo común, modificada pola Lei 4/1999 ou, directamente, recurso contencioso-administrativo ante o órgano xurisdiccional competente, no prazo de dous meses contados desde o día seguinte ao da súa notificación, de conformidade co establecido na Lei 29/1998, reguladora da xurisdición contencioso-administrativa.

Artigo 11º.-*Xustificación do pagamento.*

1. O pagamento das axudas quedará condicionado á presentación polas entidades beneficiarias da seguinte documentación:

-Certificación expedida polo/a responsable legal da entidade na cal figure a mención das actividades realizadas, o importe que se xustifica e a relación de facturas.

-Orixinal ou fotocopia compulsada de todas as facturas, nóminas e xustificantes de pagamento de todos os gastos imputables á acción subvencionada.

-Documentos acreditativos do aboamento de tales facturas e dos demais documentos xustificativos dos pagamentos realizados.

-Memoria xustificativa da actuación realizada e obxecto da subvención, nos termos e na forma que se sinala na resolución de concesión.

-Xustificante da cantidade achegada pola entidade para o financiamento da acción realizada, de ser o caso.

-Declaración complementaria do conxunto de axudas solicitadas para o mesmo proxecto ás distintas administracións públicas competentes ou ás súas entidades vinculadas ou dependentes, tanto aprobadas como as pendentes de resolución, incluíndo as resolucións correspondentes.

2. A data límite para a presentación desta documentación será o 31 de outubro de 2009.

3. Tras a recepción da documentación recollida neste artigo procederase á revisión e valoración dos documentos xustificativos da execución e, se é o caso, da documentación adicional solicitada. En función dos resultados acadados realizarase proposta de pagamento, axuste ou revogación das subvencións.

4. Revisada a xustificación efectuada polas entidades beneficiarias e sempre que esta se axuste ao disposto nesta orde, a Dirección Xeral de Relacións Laborais emitirá certificacións para poder facer efectiva a correspondente liquidación da axuda concedida.

5. Poderán acordarse pagamentos parciais a medida que a entidade beneficiaria xustifique os pagamentos anteriores, que nunca serán superiores ao 80% da subvención concedida.

Artigo 12º.-*Obrigas das entidades beneficiarias.*

1. Son obrigas das entidades beneficiarias das subvencións:

a) Comunicarlle ao órgano competente calquera modificación das condicións tidas en conta para a concesión da subvención, así como dos compromisos e obrigas asumidos polas entidades beneficiarias e, de ser o caso, a obtención concorrente de subvencións ou axudas para a mesma finalidade procedentes de calquera Administración ou ente público nacional ou internacional.

b) O sometemento ás actuacións de control, comprobación e inspección que efectuará a Consellería de Traballo, ás de control financeiro que correspondan, se é o caso, á Intervención Xeral da Comunidade Autónoma, ás previstas na lexislación do Tribunal de Contas e ao Consello de Contas, ou a outros órganos que proceda, así como a obriga de facilitar información, tal como establece a Lei 9/2007, do 13 de xuño, de subvencións de Galicia.

c) Dispoñer dos libros contables, rexistros dilixenciados e demais documentos debidamente auditados nos termos exixidos pola lexislación mercantil e sectorial aplicable á entidade beneficiaria en cada caso, así como cantos estados contables e rexistros específicos sexan necesarios, coa finalidade de garantir o adecuado exercicio das facultades de comprobación e control.

d) Conservar os documentos xustificativos da aplicación dos fondos recibidos, incluídos os documentos electrónicos, mentres poidan ser obxecto das actuacións de comprobación e control.

e) Dar a adecuada publicidade do carácter público do financiamento de programas, actividades, investimentos ou actuacións de calquera tipo que sexan obxecto de subvención nos termos regulamentariamente establecidos; en concreto, deberá consignarse o anagrama da Xunta de Galicia, Consellería de Traballo, Dirección Xeral de Relacións Laborais, en todas as actividades de difusión así como no material que se realice con motivo das actuacións realizadas ao abeiro desta orde de convocatoria, así como calquera outra das obrigas establecidas no artigo 11 da Lei 9/2007, do 13 de xuño, de subvencións de Galicia.

2. As entidades adxudicatarias de subvencións deberán estar, con independencia da súa contía, tanto antes de ditarse a resolución de concesión como de proceder ao cobramento das subvencións, ao día nas súas obrigas tributarias e sociais e non ter pendente de pagamento ningunha débeda, por ningún concepto, coa Administración pública da Comunidade Autónoma de Galicia. Non obstante, non terán que acreditar esta circunstancia aquelas entidades exentas pola Lei de orzamentos para o exercicio de 2009.

Artigo 13º.-*Incumprimento das condicións.*

O incumprimento por parte do beneficiario do prazo de realización ou de xustificación das accións concedidas, suporá de forma automática a perda do dereito á percepción da axuda concedida.

No caso de incumprimento parcial das accións realizadas, a cantidade que percibirá o beneficiario da subvención quedará reducida de forma proporcional ás accións non realizadas.

Artigo 14º.-*Modificación de resolución de concesión.*

Toda alteración das condicións tidas en conta para a concesión destas axudas ou subvencións, así como a obtención concorrente de subvencións e axudas outorgadas por outras administracións ou outros entes públicos ou privados, nacionais ou internacionais, poderá dar lugar á modificación da resolución de concesión e, eventualmente, á súa revogación.

Artigo 15º.-*Revogación.*

Procederá a revogación da axuda, así como o reintegro total ou parcial das cantidades percibidas e a exixencia do xuro de demora, nos casos e nos termos previstos no artigo 33 da Lei 9/2007, do 13 de xuño, de subvencións de Galicia.

A obriga de reintegro establecida no parágrafo anterior enténdese sen prexuízo do establecido no Real decreto lexislativo 5/2000, do 4 de agosto, polo que se aproba o texto refundido da Lei sobre infraccións e sancións na orde social.

Artigo 16º.-*Seguimento e control.*

A Dirección Xeral de Relacións Laborais poderá comprobar, en todo momento, a aplicación das subvencións concedidas para os fins programados. Para estes efectos, as entidades beneficiarias deberán cumprir as obrigas que se establecen nesta orde e axustar a execución das accións á resolución de concesión.

Disposicións adicionais

Primeira.-A resolución das axudas previstas nesta orde estará supeditada á existencia de crédito axeitado e suficiente nos programas 16.04.324B.444.0 código de proxecto 2009 01030 e 16.04.324B. 481.1 (2.062.000 €) código de proxecto 2009 01032.

Poderán ditarse resolucións complementarias cando existan fondos provenientes de renuncias de subvencións inicialmente concedidas, ou doutros remanentes. Neste caso, agás que se acuda a unha convocatoria complementaria, non poderán terse en conta outras solicitudes distintas ás tidas en conta para a resolución inicial.

Segunda.-Apróbase a delegación de atribucións do conselleiro de Traballo na directora xeral de Relacións Laborais para resolver a concesión ou denegación das axudas e subvencións previstas nesta orde, así como para autorizar, dispoñer, recoñecer a obriga e propoñer os correspondentes pagamentos, así como para resolver os procedementos de reintegro das subvencións indebidamente percibidas polas entidades beneficiarias, respecto das resolucións de concesión de que traen causas, ditadas por delegación do conselleiro.

Terceira.-En todo o non disposto nesta orde será de aplicación a Lei 9/2007, do 13 de xuño, de subvencións de Galicia, o Decreto 287/2000, do 21 de novembro, polo que se desenvolve o réxime de axudas e subvencións públicas da Comunidade Autónoma de Galicia en canto non se opoña ao establecido na antedita lei, a Lei 38/2003, do 17 de novembro, xeral de subvencións e o Real decreto 39/1997, do 17 de xaneiro, polo que se aproba o Regulamento dos servizos de prevención de riscos laborais, en canto lle sexa de aplicación.

Disposicións derradeiras

Primeira.-Autorízase a directora xeral de Relacións Laborais para ditar, no ámbito das súas competencias, as resolucións e instrucións necesarias para o desenvolvemento e a execución desta disposición.

Segunda.-Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 30 de decembro de 2008.

Ricardo Jacinto Varela Sánchez
Conselleiro de Traballo



XUNTA DE GALICIA
CONSELLERÍA DE TRABALLO
Dirección Xeral de Relacións Laborais

ANEXO I

EXPEDIENTE

PROCEDEMENTO AXUDAS DESTINADAS A ACTIVIDADES DE FOMENTO DA PREVENCIÓN DOS RISCOS LABORAIS	CÓDIGO DO PROCEDEMENTO TR852A	DOCUMENTO SOLICITUDE (S-1)
---	---	--------------------------------------

DATOS DE IDENTIFICACIÓN DA ENTIDADE SOLICITANTE

NOME OU RAZÓN SOCIAL 		CIF / NIF
REPRESENTANTE LEGAL 		DNI
ENDEREZO POSTAL 		LOCALIDADE
CÓDIGO POSTAL 	TELÉFONO 1 	FAX
CORREO ELECTRÓNICO 		
TIPO DE ENTIDADE ☐ ENTIDADE SEN ÁNIMO DE LUCRO ☐ UNIVERSIDADE		

Don/Dona con DNI nº ,
como representante legal da entidade citada

EXPÓN:

Que de acordo coa orde da Consellería de Traballo que regula estas subvencións desexa realizar as accións que se relacionan a continuación,

DENOMINACIÓN DA ACCIÓN

DECLARA:

- QUE A ESTA SOLICITUDE SE LLE XUNTA A SEGUINTE DOCUMENTACIÓN:

- ☐ DOCUMENTACIÓN ACREDITATIVA DE REPRESENTATIVIDADE SUFICIENTE PARA ASINAR A SOLICITUDE
- ☐ COPIA DOS ESTATUTOS OU ESCRITURA PÚBLICA DE CONSTITUCIÓN DA ENTIDADE
- ☐ ACTA ONDE FIGURE O NOMEAMENTO DO REPRESENTANTE LEGAL DA ENTIDADE
- ☐ COPIA COMPULSADA DO CIF OU NIF DA ENTIDADE
- ☐ UNHA FICHA POR CADA UNHA DAS ACTIVIDADES SOLICITADAS NO MODELO NORMALIZADO (ANEXO II)
- ☐ DECLARACIÓN DE CONXUNTO DE TODAS AS SOLICITUDES EFECTUADAS OU CONCEDIDAS PARA A MESMA ACTIVIDADE, DAS DISTINTAS ADMINISTRACIÓNS PÚBLICAS COMPETENTES
- ☐ DECLARACIÓN RESPONSABLE DE NON ESTAR INCURSO EN SUPOSTOS DE PROHIBICIÓNS PARA OBTENIR A CONDICIÓNS DE BENEFICIARIO DE SUBVENCIÓNS (ANEXO III)
- ☐ MEMORIA DAS ACTIVIDADES QUE SE REALIZARÁN PARA AS QUE SOLICITA A SUBVENCIÓN, ESPECIFICANDO O SEU CUSTO E DESAGREGANDO OS INGRESOS E GASTOS DA ACCIÓN SOLICITADA, CON INDICACIÓN DE SE A ENTIDADE COLABORA NO FINANCIAMENTO DA ACCIÓN SOLICITADA E, DE SER O CASO, CANTIDADE QUE ACHEGA

- QUE ACEPTA AS ACTUACIÓNS DE COMPROBACIÓN DA CONSELLERÍA DE TRABALLO.

- QUE ACEPTA A INTRODUCIÓN NO PROXECTO DAS MODIFICACIÓNS QUE SEXAN NECESARIAS PARA ADAPTALO AOS OBXECTIVOS FIXADOS POLA CONSELLERÍA DE TRABALLO E SE COMPROMETE A DESENVOLVER AS ACTIVIDADES NOS MESMOS TERMOS EN QUE FOSEN APROBADAS.

_____, de _____ de _____
(Sinatura e selo)

Presta expresamente o seu consentimento á Consellería de Traballo para que, de acordo co establecido nos puntos 3º e 4º do artigo 13 da Lei 4/2006, do 30 de xuño, de transparencia e de boas prácticas na Administración pública e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, publique as subvencións concedidas ao abeiro desta orde no *Diario Oficial de Galicia*, na súa páxina web oficial e nos rexistros públicos referidos, con expresión da entidade beneficiaria, a contía e a súa finalidade, na forma que determine o órgano competente.

LEXISLACIÓN APLICABLE <i>Orde do 30 de decembro de 2008 pola que se establecen as bases reguladoras das axudas destinadas a actividades de fomento da prevención de riscos laborais na Comunidade Autónoma de Galicia no exercicio 2009.</i>
SINATURA DO/A SOLICITANTE OU PERSOA QUE O REPRESENTA _____, de _____ de _____ <i>Conselleiro de Traballo</i>

(Para cubrir pola Administración)

RECIBIDO 	NÚMERO DE EXPEDIENTE _____ DATA DE ENTRADA ____/____/____ DATA DE EFECTOS ____/____/____ DATA DE SAÍDA ____/____/____
REVISADO E CONFORME 	

ANEXO II

EXPEDIENTE		
PROCEDEMENTO AXUDAS DESTINADAS A ACTIVIDADES DE FOMENTO DA PREVENCIÓN DOS RISCOS LABORAIS	CÓDIGO DO PROCEDEMENTO TR852A	DOCUMENTO SOLICITUDE (S-2)

DATOS IDENTIFICATIVOS DA ACTIVIDADE

TIPO DE ACTIVIDADE:	
☐ De formación ☐ Estudos e traballos técnicos ☐ Realización de ferramentas prácticas para implantación de actuacións en seguridade e saúde laboral ☐ De investigación e de prospección ☐ De difusión, sensibilización e intercambio de experiencias	
DENOMINACIÓN DA ACTIVIDADE	
VALORACIÓN ECONÓMICA:	
ORZAMENTO TOTAL DA ACCIÓN QUE SE REALIZARÁ:	
IMPORTE QUE ACHEGA A ENTIDADE SOLICITANTE:	
IMPORTE QUE SE SOLICITA AO ABEIRO DESTA ORDE:	

PERSOA DE CONTACTO RESPONSABLE DA ACTIVIDADE

APELIDOS E NOME		CARGO	
TELÉFONO	FAX	CORREO ELECTRÓNICO	

ANEXO III

DECLARACIÓN RESPONSABLE DE NON ESTAR INCURSO EN SUPOSTOS DE PROHIBICIÓN PARA OBTENER A CONDICIÓN DE BENEFICIARIO DE SUBVENCIONES

Don/Dona		con DNI nº	
na súa calidade de			
da entidade			

EXPÓN:

Que con motivo de presentar unha solicitude para a convocatoria de subvencións para a realización de actividades de fomento da prevención de riscos laborais para o exercicio de 2009,

DECLARA RESPONSABLEMENTE:

Que non se atopa en ningunha das situacións e prohibicións para obter a condición de beneficiario de subvencións públicas, sinalados nos puntos 2º e 3º do artigo 10 da Lei 9/2007, do 13 de xuño, de subvencións de Galicia, publicada no *Diario Oficial de Galicia* do 25 de xuño.

E para que conste, para os efectos da presentación da solicitude na Consellería de Traballo, asínoo en

_____, de _____ de _____

Orde do 30 de decembro de 2008 pola que se convocan, para o exercicio do ano 2009, as subvencións destinadas ás entidades locais para a implantación e desenvolvemento de bancos municipais de tempo, plans de programación do tempo da cidade, plans de conciliación local e/ou outras medidas municipais de conciliación.

A Constitución española, no seu artigo 9.2º, establece que corresponde aos poderes públicos promover as condicións para que a liberdade e a igualdade do individuo e dos grupos en que se integra sexan reais e efectivas, remover os atrancos que impidan ou dificulten a súa plenitude e facilitar a participación de todos os cidadáns na vida política, económica e social.

Así mesmo, no seu artigo 14, a Constitución española recoñece que os españois son iguais ante a lei, sen que poida prevalecer discriminación ningunha por razón de nacemento, raza, sexo, relixión, opinión, ou calquera outra condición ou circunstancia persoal ou social.

No que atinxe á Comunidade Autónoma de Galicia, no artigo 4 da Lei orgánica 1/1981, do 6 de abril, do Estatuto de autonomía para Galicia, sinala que corresponde aos poderes públicos galegos pro-

mover as condicións para que a liberdade e igualdade do individuo e dos grupos nos que se integra sexan reais e efectivas, remover os obstáculos que impidan ou dificulten a súa plenitude e facilitar a participación dos galegos na vida política, económica, cultural e social.

Atendendo a estes mandatos, elaborouse a Lei 2/2007, do 28 de marzo, do traballo en igualdade das mulleres de Galicia. O seu título VI recolle a promoción autonómica das medidas municipais de conciliación, entendidas como aquelas adoptadas polos concellos coa finalidade de facilitaren a conciliación da vida persoal, familiar e laboral das persoas traballadoras.

O Decreto 182/2008, do 31 de xullo, polo que se establece a promoción autonómica das medidas municipais de conciliación e se determinan os requisitos para a súa validación e funcionamento, recolle entre as clases de medidas municipais de conciliación de promoción autonómica: os bancos municipais de tempo, os plans de programación do tempo da cidade, plans de conciliación local e/ou a implantación de calquera outra medida de conciliación.

O mesmo decreto inclúe un mandato ao departamento da Xunta de Galicia competente en materia